





人海記卷上

海寧查慎行悔餘纂



蘇子瞻詩云惟有王城最堪隱萬人如海一身藏與東方曼倩陸沉金馬之意寄託略同余自甲子夏北遊太學又九年舉京兆秋試又十年唱第南宮其後供奉內廷者七年從事書局者三年迨癸巳夏移疾乞歸年已六十有四矣通計三十年來客居京師歲月過半其間耳目聞見隨手綴錄零丁件系不下數百條雪窓檢點裒集成卷命曰人海記

本朝初年滿洲官員支俸不支薪漢官則俸薪並支順治

甲午停秋冬二季俸有以停俸不停薪請支折薪銀者以薪侈于俸也如四品官季給薪三十金俸纔二十金耳內院不許謂滿洲方在此論俸何得濫也明年漢官但給俸不給薪矣朱右君司空云

故事舉行計典後臺省例有拾遺順治丙戌部院大計羣吏止據撫按所揭以黜陟臺省欲循故事內大臣不欲也陳溧陽力主之臺省拾遺奏上多被反坐己丑大計鑒前事雖有糾拾亦僅耳其後遂停吾邑楊少司馬為副憲時復請舉行拾遺格于部議不果督撫之權漸重矣內閣判日俱用墨筆以票旨硃筆避尊也此制起于明朝

但外而九列至斗食之例吏皆硃批獨不嫌僭上何也

八旗官兵內城分駐之地國初各有地界正黃旗則正

陽門鑲黃旗則東直西直二門正藍旗則宣武門鑲藍旗

則崇文門正紅旗則德勝門鑲紅旗則阜成門正白旗則

朝陽門即齊化門鑲白旗則安定門

漢太官園種冬生葱韭菜蘊茹晝夜燃蘊火待溫氣乃生事見漢書召信臣傳都下早蔬即其法蓋明朝內監不惜厚直以供御庖嘗聞除夕市中有賣王瓜二枚者內官過問其價索百金許以五十金市者大笑故噉其一內官亟止之所餘一枚竟售五十金而去

吾鄉呼林檎為花紅北人呼為沙菓又柰似林檎而小北人目為虎刺櫛

北方無筍惟冬筍用茅竹筒封貯從江南馬上販鮮十餘日到京每斤價值四五百錢春夏之交食蘆薹蒲芽總名為筍詩云維筍及蒲則筍與蒲故當有別

佐領即牛录也秩如明朝千戶專管戶籍秩雖卑凡位居公侯伯者並俯聽其派撥亦猶縣令之轄鄉紳

滿洲八旗騎兵月餉七兩五錢步兵三兩四錢綠旗騎兵月二兩步兵一兩五錢城守兵月一兩水師同達月小盡扣銀五分謂之朋椿官馬斃則以此項買補凡騎兵止給

官馬鞍轡自備

滿洲子弟入學倡于順治辛卯壬辰時范文程當國初試百四十人入庠歲考止三等上者賚絹二疋其赴科舉初場止二義廣寧楊方興山陰沈文奎並解元麻勒吉為狀元另為一榜戊戌以後乃列名漢人榜間亦有成七義者矣

初徙八旗園順天永平保定河間之田凡腴畝巨宅悉歸旗下謂之莊子順治癸巳以水災四府莊子俱荒欲改園真定順德廣平大名地戶部持之不行

溧陽相國以甲午三月賜死時年五十宣武門內靈官殿

乃杜郵之地也

陝西織造絨褐本朝初年設有專員順治辛卯始省以此項錢糧充餉

世祖章皇帝於甲申十月朔入燕甫七歲是日一御殿自後元旦萬壽節俱免朝賀至庚寅正月朔始御殿受賀順天鄉試初用考試官四員內滿洲二人主八旗蒙古應試者後止二員並用漢人

滿洲編檢視漢官俱晉一品而於滿人為卑以滿官止七品也

吏兵二部每月選期舊于天安門外兩廊設矮几鋪紅氈

席地而坐尚書二人正面吏部西向兵部東向侍郎旁列其餘司官筆帖式以次排比選人于前唱名掣籤今兩廊列牆屋各官俱露坐

順治甲午正月始頒文武諸臣制誥封贈八旗勳衛數萬人其祖父之名類皆闕失意不欲制詞漢官力爭之於是內院擇坊局史官十六人分撰自一二品始一品限十二句二品十句三品八句四句不用故實

順治癸巳三月廿五日改鑄朝鮮國王印兼滿漢文以從前止漢篆也

出繼之子離任為本生父母治喪自北平朱右君諱之先

生始先生時官戶部侍郎其後大臣遂援為例
西洋人生日不論本誕如立春日生其日無定期或十二
月或正月遇此節即是也
回回人雖在中國不奉正朔自有回回麻亦不限十二月
為一年別有歲朝每年不同乙丑八月初三日為羣聚慶
會之期余在都下親見之

皇城西苑萬歲山上以西僧言建白塔三層形如瓶按元
世祖至元二十八年五月丁巳從楊璉真伽之請于臨安
建白塔二各高一丈二尺以居呪師朵四的姓吉等七人
其事本此

四川開科始順治辛卯解額七十一人喪亂之後舉子止
二百餘人主司駐保寧寓試道士院時有亭溪之警急於
竣事二三場併日

開河舟阻官舫於總河處求給讓行牌以先商賈今無此
例矣

永城人宋獻策明末賣卜燕市遇李自成拜國師導之入
都自成敗後滿洲重其術隸旗下其人至康熙初年乃死
南京後湖貯各省戶口田糧冊有明終始計一百七十萬
本南渡後用以造甲點火藥至本朝僅存萬麻間及崇禎
五年者朝議謂每本重四五斤鬻之可得四五萬緡

貢士落卷許其闕自順治乙未始時禮科議南卷十中其一而江西僅七人物議藉藉於是大總裁金之俊奏落卷等貯于順天府許貢士赴閱限六日內不得領回前此未之聞也

翰林外轉順治乙未九月始行之編檢則范周沈荃盧高湯斌耿介崔之暎馬燧魯等少詹以不開坊以上則黃志遴楊思聖王舜年藍潤王元咎陳煥等共十八人皆以品行清端才猷贍裕各照外轉應得職銜陞一級遇闕即補康熙戊辰編檢汪楫丁廷棟李濤三人以知府用辛未冬少詹徐潮轉通政司侍讀胡會恩轉光祿少卿侍講熊賜

瓚轉大理寺丞高裔勵杜訥俱轉通政叅議宮坊李應薦轉太常少卿周清源轉叅議司業吳涵轉叅議

世祖嘗言明朝之亡由周延儒馮涿州少子娶宜興從女初頗為解上不以為然又問延儒有子官翰林今安在銓詭對曰庶吉士周奕封非延儒子也時奕封請假在籍乙未秋還朝俄除知縣乃涿州希旨外之也

各鎮總兵官銜帶都督同知或僉事在明朝有五軍都督府故也今都督府已裁而總兵仍兼此銜甚屬無謂正陽門外窮市有古鐵長三尺許衡二寸形若草帶中虛外繡面背隱起釘如故不甚可辨一日高麗使見之售以

五十金云此定水帶也禹治九州作九帶此其一也若航海海水鹹不可飲以帶投之立甘冽故貴耳市中好事者隨至會同館汲苦水石餘投鹽數斤揉之使濁乃投帶于中沸涌作魚眼數十少頃味極甘列明季太學石鼓文舊六百五十七字元至元中存者三百八十六字今所存者但三百二十五而已

西山碧雲寺俗名于公寺寺後為正德間大瑞于經墓土木華麗凡賜祠五多祔冢中央豐碑二道正面無文其碑陰詳刻魏忠賢爵里姓名意殊駭詢之守僧云忠賢名下蘇應宣或云葛九思嘗被掠于建州從本朝入燕葬其衣冠于

此余憤甚直前渡之時與朱大司空同遊公不以我為狂也。按碧雲寺忠賢重脩天啓三年少師葉向高撰記禮部尚書會稽錢象坤篆額今碑磨去錢象坤姓名意作相時事也福清記中亦頗稱許魏氏

香山永安寺來青軒額明神宗手書軒之前有山突起金章宗發屋臺也下有護駕道松覆之稱護駕松今尚存其一

弘光寺在香山絕頂永樂間太監鄭和建和朝鮮人四使本國中有佛閣形圓而入觚云東國之制去香山二里許為鮑公寺亦內官墓中有白松八株圍皆

三抱掩映殿宇人行其下衣上不見日色
盧師山清涼寺中秘魔崖古柏一株長可尺許橫出石縫
不凋不榮云盧師手植也石經山亦有古柏一萬厯初上
過之御書靈根古柏四字
大功德寺舊名護聖寺直景山口與景陵相近宣德朝雪
峯大覺禪師駐錫于此宣帝御賜詩當年天下選高僧獨
取尊師第一名即拍雪峯也園林自景皇帝外又有懷猷
悼恭哀冲莊敬憲懷猷懷悼懷故太子七衛許忻申蔚岳
景頴威薊均靖邠簡懷悼故王十六殤主二十六仁宗妃
三宣宗妃一英宗妃憲宗妃十二按史皆葬金山與景陵

相屬凡五十三園今不可別識矣
吾邑談孺木先生留心明朝典故不以詩名然其北遊集
中如過文信公祠七律一聯若云丞相宜全節敢謂書生
合出山過陳溧陽里第云往事思仇虛偃月新編賢否總
銷魂陳餘刎頸交何在范蠡扁舟事可行過惠安伯張氏
墓云翁仲似人能化石杜鵑本鳥不離枝贈王玄照先守
云縱寫青山非舊日翠微雲亂夕陽中過梅村先生值金
壇王友三感舊云衣冠王謝多何益門戶胥原大可憂南
宋朝廷多覺小中原經濟亦誰曾贈易道未太常云休屠
祭後全非像博望歸時不待槎除夕云春兼臘月人歸少

寒倍燕京客受多如此之類皆名句也

吏部楹帖明萬厯初冢宰錢唐張幹立功名身外事大就何妨小就何妨富貴眼前花早開也得晚開也得西洋畫以胡桃油漬絹抹藍或綠或黑後加采焉不用白地

海運道里詳梁太宰夢龍集中自淮安府至安東縣九十里安東至馬洛關五十里馬洛至蘆浦四十里蘆浦至楊寨四十里楊寨至白沙關二十里白沙至雲梯關二十里雲梯至淮河套六十里淮河套至大海東洲山百二十里東洲山至高公島三十里高公島至鷹游山三十里鷹游

山至盧溝所十五里盧溝所至青口六十里青口至興莊五十里興莊至東流所百里東流所至濤落場三十里濤落至信陽場百二十里信陽至齊堂島四十里齊堂至靈山島九十里靈山島至竹槎島五十里竹槎島至浮島四十里浮島至灣島六十里灣島至鼇山管島三十里管島至田橫島七十里田橫島至欽島十里欽島至青島百二十里青島至海洋所灰島七里灰島至炕兒島十八里炕兒島至玄城島百廿里玄城島至雙駝埠二十里雙駝埠至寧津所八十里寧津所至成山衛五十里成山至青雞島六十里青雞至羅山所五十里羅山至威海衛四十里

威海衛至劉公島五里劉公島至寧海州七十里寧海至
空空島五十里空空島至奇山所三十里奇山至福山縣
三十里福山至登州新海口八十里新海口至沙門島六
十里沙門至桑島五十里桑島至萊州岬岬島四十里岬
此島至三山島八十里三山至芙蓉島五十里芙蓉島至
海倉百里海倉至魚兒鋪十里魚兒鋪至白狼河五十里
白浪至八溝河五十里八溝至小清河二十里小清河至
清河五十里清河至絲網口十里絲網口至江全河十里
江全至大口子四十里大口子至大清河十里大清河至
唐頭寨十里唐頭至小沙河五里小沙河至渾水汪十五

里渾水汪至降河三十里降河至乂山河十里乂山至大
沙河二十里大沙河至泊油河十五里泊油至套河十五
里套河至沙頭河十里沙頭至大溝河三十里大溝河至
桑白河三十里桑白至徐家溝十里徐家溝至乞溝河七
十里乞溝至大沽河二十里大沽至天津衛百五十里天
津至張家灣八十里通計淮安至張家灣海道水程共三
千三百九十里

隆慶辛未海運初雇海鵬船五隻分載米二千石每駕舡
十二人自淮安至天津試運無碍海道灣泊舟行停泊宜
在舊設墩上畫樹旗幟夜懸燈籠以便趨集嘗攷平江伯

陳瑄督海運于靈山建烽火臺高三十餘丈今宜師此意
多為標識云 棗林雜組

明官制一書不載翰林院庶吉士蓋官制定于洪武年間
而庶吉士則始于永樂二年甲申也似宜補入按永樂二
年三月己酉選庶吉士楊相等五十人並習文湯流王英
等十人並習書四月甲申進士沈升等俱改庶吉士修書
五月辛丑諸司辦事進士能書者曾慎等二十九人為庶
吉士一科凡四選

崇文門外二里大通橋東園舊麥鹿處地平如掌湯衍可
數里名鹿園

寶坻銀魚似吳中鱸殘而大倍之出海中舡山下霜降後
汧流而上育子諸浣中夏霧映日波浪皆成銀色土人候
其至網之瓦窰頭出者尤佳明朝命內監提督冬月抱子
以冰追縣設六廠漁戶一百七十人歲進凡七次

蘆溝橋石獅兩行共三百六十八

石經山在房山縣西南四十里生懋題草他處所無
長平公主崇禎周后所出甲申春年十五議降周太僕其
子世顯將築館遭國變帝以御劍斫右臂斷腕賊以貴主
已殞授尸國戚五日復甦順治二年公主上書願皈依空
門上不許詔求原配周世顯應詔起即故武清侯之第賜

金錢牛車庄一區田若干頃俾成禮時乙酉六月上浣也
明年丙戌八月十八日薨年十七詳華亭人張晨記事及
吳梅村集中孫侍郎春明夢餘錄則謂公主甲申年十五
傷右臂肩際明年乙酉九月成婚丁亥卒年月互異不知
孰是

華亭王圻續文獻通考藝文類中載琵琶記樂府水滸傳
又明朝宗室鄭越襄荆淮滕梁衛八王并仁宗子而云成
祖子其誤尤甚

京城各巷曰某衙衙其義無所出謝肇浙五雜俎曰閩中
方言官中小巷謂之弄南史東昏侯遇弒於西弄即巷也

元朝經世大典謂之火術後因訛為衙衙

惠世揚米脂人萬曆甲辰進士歷刑部侍郎李自成故牧
卒也常給事世揚之家及僭號語人曰得惠先生來則甚

善因致書世揚即至拜右平章事時左平章則牛金星也
自成敗後本朝兵入燕三年不見用後放歸綏德副總

兵王永強作亂劫世揚從軍敗于米原鎮永強自縊世揚
不知所終 東林雜俎

北京戶部節慎庫金銀元寶各一蓋鎮庫之物以梯登其
上其邊尚高于人上刻永樂九年

左薩石懋第北使被幽留都陷至攝政王使人宴左

侍郎飲酣語曰此太平宴也左問所自曰江南破矣左悲
不勝仆絕于地作絕命詩閏六月十八日遇害都人吳某
收殯同時被難者五人其一則兵部司務加職方主事崑
山陳用極也棗林雜俎

姚廣孝謚恭襄初從祀太廟嘉靖中移祀大隆善寺故元
崇國寺也今斥為馬廐

崇文門內舊有于忠肅公祠萬曆乙未二月己未勅建額
曰忠節本朝順治中公之像旁被毀吾邑人談樞木作弔
于太傅祠文以憫之今相傳為京師城隍神
江寧靈谷寺琵琶街側有池曰八功德水今涸按八功德

水見佛書在天竺國一清二冷三香四柔五甘六淨七不
噎八除病
各省俱有湯泉直隸十三江南十三山西十一山東十七
河南十陝西十四江西十七湖廣十六四川八福建六十
一廣東十五廣西三雲南十八浙江三貴州二大抵其下
有白礬丹砂硫黃三物乃蒸為煖流後周王褒溫泉銘云
白礬上徹丹砂下流明廣陵桑喬云雷火所灼其氣亦硫
蓋極陽之氣也

明朝諸陵孝陵在應天府朝陽門外鍾山懿文太子祔葬
于側曰東陵長陵在昌平州城北天壽山自紅門進御道

凡二十里餘舊名東祚子山永樂七年卜建改名天壽後
視高山數十重來龍跌斷明堂平澗祔葬十六妃獻陵在
長陵右祔葬四妃景陵在長陵左祔葬七妃裕陵去昌平
二十五里獻陵之西祔葬十八妃茂陵去昌平二十七里
裕陵西北祔葬十四妃泰陵在茂陵西無祔康陵去昌平
三十五里泰陵之西九龍池環其前永陵去昌平十八里
長陵之東南兵部侍郎餘姚駱用卿所擇祔葬妃三十嬪
二十六昭陵定陵在大峪嶺徐尚書學謨所擇時通政叅
議梁子琦等難之為輔臣申時行王錫爵所斥崇禎初尚
書姚思仁督理多朽石吾邑陳與交以給事中巡二宮壽

宮五室中三間待馭四隅維以鐵索各大銅缸注油左右
室通門待中宮及嗣帝所生母升祔神廟閱壽宮自坐右
室飲酒慶陵德陵石橋高不五尺長不五丈砌石無多而
耗二十萬金且陵地窄甚僅當兩山之腋在永陵左沙相
距不百步也思陵在紅門西三里與諸陵隔河諸陵在河
北思陵獨在河南即故皇貴妃田氏園諸陵明樓俱有碑題
某宗皇帝之陵稜恩門內有碑俱無字闕以木柵本朝入
關惟定陵猶被燬餘仍令太監守護康熙二十年添設
守備一員

皇城北苑中有廣寒殿相傳遼后梳粧樓成祖定鼎北京

勿毀以垂鑒戒萬曆七年五月四日樓傾梁上金錢百二十文云至元通寶則樓崩于元初非違時物矣張江陵雜著涿州桑乾河中有塔名鎮河嘉靖元年塔崩內有古錢皆飛空如蝶自後河水不時泛溢涿州志都御史葉盛巡撫宣大於沿邊孔道俱設煖舖即唐人邊舖也

薊州水厰明季已有之凡十六所本朝兵始至問厰何為曰藏冰者謂伏兵也焚其五始悟一品榮歸日雙親未老時嚴文靖公堂聯無毀無譽三代直道而行知止知足四時成功者退申文定聯財不求贏敢為子孫益

過位嘗踰分當思齒角難兼陸五觀此足見盛世縉紳氣象

沙河縣宋文貞公璟碑斷沒土中正德丁丑縣令方思道治鐵二百斤貫而續之今尚存不甚剝蝕德清談未蒼宰此邑曾以捐本見貽

保定有定霸城宋楊延朗所築金時以其磚他用其土基尚存嘉靖中霖雨潰城西北隅得人骨數十具植立土中髑髏各戴兜鍪旁倚兵仗石刻云活築惰工百戶徐瑾一行兵役見者竦然長安客話

成化初韓襄毅雍南征平大藤峽斬大藤中鞞草為鼓

置忝府前聲震數里兵使某移于行臺扣之無聲移歸故處聲復鳴

京師皇城內西苑古檜一松四并金時植嘉靖中封松為指揮使其俸米專飯孤貧

國子監文廟古柏並元許文正公手植

京師外城天壇柏榆錢凡榆春錢獨天壇之榆錢以秋報國寺舊有矮松二株其右尤奇幹長不過數尺而枝橫數丈丈人往往觴詠其旁自內城城隍廟中移于此每月三度為榻馬之具數年來無復存矣

槐樹斜街即土地廟斜街舊時古槐夾路今每月逢三八

日為市集槐亦僅有存者

昌平州天壽山古槐相傳竇禹鈞家物樹中枵可布三五席稱竇家槐按禹鈞周之諫議大夫也故居在薊州城東今其地尚有竇氏莊

涿州西南十五里樓桑村昭烈故居按本紀道右有大桑高十丈如羽葆乙丑二月同楊耑木游此覓土人為向導至則頽垣破廟間所謂樓桑無能指其處者廟創于唐乾寧五年先主像與關張並列

三峽產雲南稗一名鷹爪稗播種畦植與五穀爭價他處所無也

遼陽東二百餘里山深林密不見日色下產人參其苗高出百草之上採者以夏五月裹糧披榛而入或迷徑為虎狼所啖或人相遇弱者鬪死强者攫所有而出以地近皇陵恐傷龍脉過來挖參之禁甚嚴罪至誅死而趨利之徒輕生不顧也

大內多異物歲一閱視出之于廷有瓜子長五六寸濶如之不知何地所產袁貴妃父祐說見楊文聰玉堂薈記

旱金蓮花五臺山出瓣如池蓮較小色如真金曝乾可致

遠初友人自山西歸有分餉者以點茶一甌置一朶花開

沸湯中鮮新可愛後扈從出古北口外塞山多有之開花後在五月間一入秋莖株俱萎矣

各省歲貢芽茶共四千二十二斤內江南宜興縣百斤六

安州三百斤廣德州七十五斤建平縣二十五斤浙江長

興縣三十五斤即芥茶嵯縣十八斤會稽三十斤永嘉十

斤樂清十斤臨安二十斤富陽二十斤慈溪二百六十斤

宋置茶局進貢元明因之麗水二十斤金華二十二斤龍游等縣共二

十斤臨海等縣共十五斤建德五斤淳安五斤遂安壽昌

二縣共六斤桐廬二斤分水一斤江西南昌府七十五斤

南康府二十五斤贛州府十一斤袁州府十八斤臨江府

四十七斤九江府百二十斤瑞州府三十斤建昌府二十

三斤撫州府二十四斤吉安府十八斤廣信府二十二斤

饒州府二十七斤南安府南康縣十斤湖廣武昌府六十斤岳州湘陰縣六十斤寶慶府邵陽縣二十斤武岡州一十四斤新化縣十八斤長沙府安化縣二十二斤寧鄉縣二十斤益陽縣二十斤福建建寧府建安縣一千三百六十斤內探春二十一斤先春六百四十三斤次春二百六十二斤紫笋二百二十七斤薦新二百一十斤崇安縣九百四十一斤內探春三十三斤先春二百八十斤次春一百五十斤薦新四百二十八斤。南宋時蘇州茶額六千五百斤元無額明納錢三百十九萬三千有奇。成化三年南戶部奏准供用庫歲用芽茶坐派池州府二千斤徽州

府三千斤茶葉徽州府二千斤蘇州府二千斤滁州府二百斤徐州二百斤和州三百斤廣德州三百斤。四川茶園十株取一徵茶二兩茶四十斤易番馬一疋李文忠以茶五十餘萬斤易馬一萬三千五十八疋今茶課本色十五萬八千八百五十九斤係石泉建始長寧等縣并建昌天全烏蒙鎮雄永寧九姓土司辦納。陝西茶課今五萬一千三百八十四斤係興安紫陽石泉漢陰西鄉歲辦。宋元時貢芽茶以建安為上明朝不貢閩茶即貢亦備宮中浣濯甌盞之用貢使率費銀抵京買納間有採辦亦取諸延平非武夷也延平人呼製茶者曰碧豎

龍生九子蒲牢好鳴囚牛好音螭吻好吞嘲風好儉睚眦
好殺鬮屬好文狴犴好訟狻猊好坐霸下好負。又博物
志憲章好囚饕餮好水蜥蜴好腥螻蛄好風雨螭虎好文
采金猊好烟椒圖好閉。蚘蚘好立陰鼉魚好火金吾不睡
皆龍種也

平湖徐在中以工部郎分司張秋張真人舟過其侍兒膚
貌清麗徐見而謔之真人曰先生宜自重此某地龍也徐
不信命進盃水侍兒躍入雷雨應時而作
萬曆己卯行人謝杰使琉球航海颶風作大雷雨有龍二
掛于檣上一長年曰此來朝壘書耳急扶杰起書免朝二

字示之即退

龍涎香出蘇門答刺國其國西有龍涎嶼峙南巫里浮洋
中羣龍交戲其上遺涎烏國人駕獨木舟伺採之每一斤
其國值金錢一百九十二枚准中國銅錢九千文嘉靖三
十四年下戶部取龍涎香百斤徧市不得廣東藩司購每
斤懸價千二百金僅得十一兩進內驗不同仍亟取真者
廣州獄囚馬那別的貽有一兩三錢上之黑褐色密地都
密地山夷人繼上六兩白褐色細問狀云黑者採在水白
者採在山皆真不贗尋有密地山商再上通前共十七兩
二錢五分次年進內辨驗是真自後夷船稍稍挾來定價

每兩售百金其為用入香合和能斂腦麝清氣數十年香味仍在焚之萃烟裊空不散涎味有三品一曰泛水二曰滲沙一曰魚食泛水者輕浮水面泗人伺龍出隨取之可入香用滲沙則凝積多年氣滲沙中魚食則化糞散于沙上皆不中用而魚食又有二種海旁有花若木芙蓉者春夏間盛開花墮海中大魚食之或先食龍涎則腹中脹滿昂頭向石上吐沫乾收可用惟糞者不佳

弘治元年左副都御史邊鏞奏禁織蟒云爾雅蟒者大蛇也蟒無角無足龍則具角足今織蟒俱龍非禮請禁之脫蛇出崑崙山聞人聲即寸斷人伺其斷鉗取之須寸各

異處待風乾入藥若少頃無人聲寸寸仍續成蛇主治色癆及驚疑喪膽諸症本草方書不載見玉鏡新談

八梢魚灰褐色無鱗腹圓口生腹下後拖八尾產遼東海中永平盧太守騰龍以魏明相國庖人來詢鮓治之法余亦不知也以意答之用滾水燻去皮其尾如猪小腸而色白寸斷之用葱韭雜炒及登盤腥氣觸人不堪下箸而一統志載入遼東物產太守以充土貢何所取也通州人葛原六以布衣獻魴魚百尾時用法嚴或阻之原六笑曰爾不上食父母耶君猶親也庸何傷及至上占問曰魚羹何如對曰臣未進不敢嘗也上大悅命賜酒食仍

還其一日勞汝其後歲進至九十九尾著為令
永樂時山東進野蠶絲製衾薦太廟羣臣稱賀今齊東山
谷處處有之與家蠶等蠶月蛭種出蛾散置樹上聽其眠
食食柵葉者名柵紬食椿葉者名椿紬食椒葉者名椒紬
野人飼蠶架廬林下手長竿逐樹按行為禦鳥鼠其穰者
春夏秋歲三收焉有一種蠶之小者作蟹堅如石大才如
指頭在深谷叢林間不關人力樵牧遇之收曰山蠶
弋陽汪少宰偉嘗赴中官席飯僅半甌香滑而膏異於常
產問所出則蜀中歲進其未生于鷓鴣每尾止取二粒放
去明年仍可取也

西苑獅日食一羊西域胡人主之白布纏首金帶衣綠衣
正三品料
明孝陵享殿太祖高皇后南向左淑妃季氏生懿文太子
秦愍王晉恭王次皇妃某氏生楚王魯王代王郢王齊王
谷王唐王伊王潭王又次貴妃某氏生湘王肅王韓王藩
王又次貴人某氏生遼王又次美人某氏生寧王安王俱
東列碩妃生成祖獨西列見南京太常志孝慈皇后顯然
無子而弇州別集同姓諸王表自懿文成祖外秦愍王棟
晉恭王桐周定王楠俱母高皇后吾學編亦然與志不合
不可解也

鄭貴妃父承憲貧甚以女許孝廉某為妾臨別悲慟孝廉
聞之遣還不責聘鄭感其意脫隻履予孝廉矢報已而入
宮大得幸念前事而忘孝廉名命小璫售隻履于市索直
若干無應者時孝廉計偕聞而往合其履妃泣告于上曰
非若人妾不及執巾櫛矣上何孝廉謁選得善地歷官鹽
運使貴妃後生福王常洵有如意之愛上書其名于金盒
屬妃藏之約他日以為東宮辛丑十月皇長子受冊貴妃
持盒泣訴之上啓書字俱蝕歎曰此天也妃卒後謚恭恪
惠榮和靖皇貴妃
孝節貞肅淵恭莊毅烈皇后周氏父奎蘇州人微時寓京

師寄食為人莞庫元配生子鑑繼丁氏生子 及后信
王選妃后與馬信邸入正大位后生東宮及定王貴妃田
氏生永王悼靈王貴妃寵日盛意圖奪嫡一日永和宮婢
貴妃居於金狻猊下悞觸定王中宮銜之上每名貴妃妃
永和宮於金狻猊下悞觸定王中宮銜之上每名貴妃妃
例御鳳輿小璫昇之是日昇以宮婢上問故曰小璫多恣
肆無狀扣其實曰聞坤寧宮小璫狎宮人故遠之耳上色
動即搜其處大得狎具蓋宮人各侶其璫所謂對兒也一
名對食上驟怒立遣諸小璫中宮因懟恨成痰嘔血有老
宮人曰田氏宮中獨無對兒乎亦可搜也已而果然上親
始釋都督田弘遇聞之大怒嗾貴妃上章引咎上意解令

省愆例閉中門從旁門出且以章示中宮明無嫌也其章出御史湖南劉興祥手蓋弘遇所囑云貴妃薨明年春弘遇復進少女年十三見寵欲即進封司禮太監某言貴妃以選入非外進也乃止賜珠簾等物嗣後貴妃妹走天津珠簾猶存後為朝士某妾。按田貴妃名秀英其妹名淑英

徐中山第三女名妙錦文皇欲取為繼后女不可因不嫁而為尼嘗論革除事建文君當坐殿上燕王至苟不讓則死之何必自焚竄每語遜國事未嘗不痛哭也崇禎十六年五月大學士周延儒放歸復見徵知不利求

解於中宮賂嘉定伯周奎十萬金達之中宮請授指東宮東宮每晨謁及是啟曰近來久不見周先生何也上曰爾何自知周先生答曰父皇嘗稱周先生故知之上曰此非好人今不得稱先生上心知其奸尋賜死其日黎明錦衣弁同法曹至私邸排闥而入家童各驚匿周求青衣未得緹校脫而衣之拜命飲泣求筆墨占向倉皇不屬使者促之投筆就縊

萬曆十二年故太師張居正子禮部主事敬脩自縊遺辭其略云五月初三日邱侍郎至府初四日即差官提敬脩面審大意坐先公以二百萬家貲又要板承天夷陵本縣

三家坐曹確菴家寄銀十五萬坐王少方家寄銀十萬兩
坐傅大川家寄銀五萬兩只得從當事之意料三家斷不
能完結此事吾日後何面目見之又以母子叔姪恐團聚
一處有串通之弊於五月一日出牌追令隔別不得接語
幽囚倉屋風雨蕭蕭青草鳴蛙無不助予之悲悼遭時如
此已無生路不得已託言片楮以代剖心此書送各司道
一日五月十日寫完以期必遂而夢兆稍吉不果至十三
日各欽差上司會審叔姪俱嚴刑拷訊父母遺體平生眼
不見刑具脆薄之軀豈能勝之此數之莫可逃也任巡按
活閻羅你也有父母妻子之念何忍殺人媚人如此之酷

烈也有便乞傳山西蒲州張相公說張門事已完結矣無
煩掛念願你輔佐聖明天子於億萬年也云按邱侍郎名
擢齊人懸贓酷拷貽楚患數年卒無子任巡按名須更考
康熙乙丑年元旦立春有大老署門云歲朝春百年難遇
聖天子萬壽無疆按崇禎元年元旦立春陳眉公用此聯
作楹帖

郊上平社稷上戊文廟上丁戊在丁後故先丁如十日丁
則一日戊當先戊而後丁弘治間吏部主事楊子器上言
戊從初十之丁則次戊非上戊也時無請禮者竟寢不行
李崆峒集

四明中秋宴飲以八月十六日相傳史彌遠官臨安還家
度節阻風是夕始到遂沿為俗葉業師云

洪武十七年勅每月朔望祭酒以下行釋菜禮郡邑長以
下詣學行香。按北齊每月朔祭酒博士諸生展拜階下
郡縣朔朝朔日行禮始此其後遂以朔望行香朱子曰謁
宣聖焚香不是古禮拾香不當叩頭只直上拾香即出笏
叩頭而拜由是觀之則宋已然矣

康熙甲子秋九月海岱門內地中忽作聲有光如電初以
為地震也已知其地舊埋火藥覆以大石板上土厚尺餘
不知何故忽發飛石所中凡傷二百餘人

無錫邵文莊寶雨辯云雲興于山勃然滿盈既蘊而降以
雨者山雲也謂之山雨雲興于海條然瀰漫既翕而成以
雨者海雲也謂之潮雨海雲之雨乘風以行雷鳴則止山
雲之雨挾雷以動風吹則散海雨夏少而秋多山雨夏多
而秋少

弘光初有攜日本小麻一紙來者字體並從本國書首題
寬永二十一年及大將軍等字

房山縣石經山峯巒秀拔名小西天隋大業間僧靜琬懼
本教有難不能流通發願募工鑿石刊造一大藏經積于
此山至唐貞觀初僅成大涅槃一部靜琬沒後其弟子通

刊造餘部歷遼金始完一大藏貯于岩洞者七地穴者三
洞鑿以石門穴鎮以浮屠自來兵燹不之及二郎神即嘉
州守趙煜斬蛟者也不知何代封為清源妙道真君

泰山自下至顛五千三百八十四步五尺紆折皆在其中

高三百八十六丈九尺一寸實十四里零八十餘步應劭

漢官儀云自下至古封禪處凡四十里者妄也有泰山道

里記沁水張大理五典云

靈隱飛來峯元僧楊璉真伽編鑄佛像明嘉靖朝太守福

清陳仕賢王辰進士以楊及郊僧聞僧三石像斷其手瘞獄中

獄中大疫或云悞毀佛像也

入蜀有三谷四道西南曰褒谷從褒入南曰駱谷從洋入

東南曰斜谷從郿入其所從各殊舊志謂首尾一谷者非

也其棧道有四從成和階文出者為沓中陰平道鄧艾伐

蜀由之從兩當出者為故道漢高帝攻陳倉由之從褒鳳

出者為今連雲棧漢王之南鄭由之從城固洋縣出者為

斜駱道武侯屯田渭上由之丁卯五月吾鄉許時菴編脩

典四川鄉試欲強余同往余不果行為詳考道里以當贈

行之篇

甲申京師被陷始末詳談孺木金陵對泣錄中今全錄於
後云光祿寺署丞膠州高弘商自賊中脫歸秋末省其兄

相國備述前厄云三月己丑朔甲辰上召考選中外官三十三人於中左門諭曰國家多事南寇北聞寇已薄固關雖無確報可謂迫於門庭朕已脩省待咎此時何以撲勦何以安人心何以生財何以足用爾等其熟計之磁陽知縣黃國琦首對曰賊之驕由于招撫從來招撫無裨于事上問安人心對曰安人心不難在于聖心聖心安則人心自安上首肯筆記其名又問生財對曰今生財云加派云捐助俱非也豈非一而再再而三乎皇上宜搜內藏盡所有以為用上又首肯因問用人對曰天下未嘗無人但人未必為用上大是之立除兵科給事中餘以次對未畢

俄傳外札上手拆視訖倉皇遽退各官不敢散已傳駕回宮各官乃散知賊已至昌平也各官環閣臣于御河橋揚觀光等責以城守事魏藻德曰大家做靠不得一人是日內閣課庶吉士東宮日講官劉理順何瑞徵講論語首章未竟賜茶退夜二十刻部推左懋泰戎政兵部右侍郎總督城守未報乙巳閉都門時傳吳三桂兵至不知即賊也夜攻阜城門即平井廣寧門即彰義西便門漏下二十刻砲聲漸急丁夜後砲愈急賊環攻有旨城堵尚虛一千八百守卒俱稱無餉襄城伯李國楨不登陴丙午巳刻賊入阜成西便二門人不知也丁未昧爽市人云宮女出西華門

或傳聖駕昨出城辰刻宣武門北有內臣戎服可千騎六
王太監救火呼開門荅以鑰在中府擊之鎖未碎或云前
門開遂沿正陽門至則被矢砲不可近自長安右門還宮
已刻賊入宣武門肆掠內臣被禍尤慘李自成射承天門
題榜矢中天字上馳入宮午刻偽示五城購車駕所在戊
申午前內傳先帝自盡于煤山偽諭明朝文武大小官員
俱限次日赴各將軍帳下具職名彙冊送覽願復官者量
才擢用不願復官者革職為民准給路引即放回籍敢有
匿而不報兩鄰長班房主一併誅戮自是各官俱分投職
名權將軍李友家自己至酉共報七十三人劉斯珠等其

去者以革職回籍也主賊錄職名籍貫履歷寓舍僮婢長
班錄訖皆驅對廳銅之工部侍郎陳必謙不即入擊以輿
杠己酉先帝后移東華門席舍武選主事大足劉養貞出
私錢八千得柳棺殯之先帝不幸時首露網右足靴身衣
短後布衣胷題朕既喪國無顏冠冕見人是日同先后長
椅昇出先后衣并甚肅臭微傷其裳紉結越三日賊出梓
宮二一丹漆一黝漆改殯焉先帝翼善冠龍袍玉帶滲金
靴先后袍帶亦如之定王騎騾來臨不敢哭而去次東宮
亦騎騾至青衣褻帽頭觸地良久雖不哭隱痛不能起賊
擁之去諸臣臨哭可四十餘人臨而不哭者三十餘人養

貞日侍側哀毀被執至李友處友據邱字衎衎許錦衣宅
年五十餘性克悍所錮各官許家人傳餐印其面而入出
即去之癸丑薄暮李友傳各官據朝本朝見光祿寺監事
林蘭友問朝本何若有佐使吳某云紅摺黃面開職名朝
見蘭友如其言餘倣之刑部尚書張忻言黃摺非所用付
紅單職名酉刻李友列騎七十三隊隊騎各五露刃押各
臣赴寓鋪偽將劉宗敏拘千六百餘人夜半叱起俱蓬垢
人予匹馬飛驅入西長安門出東長安門過御河橋皇王
夾道進東華門始知非朝也至會極門偽相牛金星深衣
盤坐棕毯上面東向右侍郎宋企郊盤坐金星側北向金

星據縉紳錄一部硃筆點唱先令甲科打恭餘誦鄉貫諭
高聲以應或托疾則令扶俟合選即圈予錄上赴郎聽銓
注畢且回各營奔什數人乙卯又選各官味爽由午門入
會極門牛金星宋企郊如前唱選預名者令候會極門否
則出東華門或令出西華門不解其故蓋東皆回營西皆
斬于門外凡七十六人多勳戚丙辰各營拷職官追贓內
臣加炮烙尤慘劉宗敏家論官大小勒限贓完日釋之李
友等各混拷不勒限李友家七十三員選用二十九人聽
其自捐夾傷十之四劉養貞再夾惟呼太祖高皇帝追四
十三兩又銀杯二又徵之不起曰我寧死也王都等杖斃

党崇雅除通州倉場侍郎來謁李友角巾綠衣諸人就問
竟感額不答中書科舍人吳橋沈集始被拘伴風疾時呼
流賊來殺流賊屢受鞭不之拷至四月二十二日同釋四
月戊午朔乙丑黃紙傳二十七日即位塘報吳三桂舉兵
徧京師戊辰李自成馳偽勅及吳襄手書招之三桂碎其
勅擲文書不啟斬從使四人釋回一人自成聞斬使大怒
召李友等點兵站隊庚午自成脅東宮二王及吳襄東行
步騎三十七萬戊寅吳三桂擊自成大敗之僅四萬騎四
京步卒盡沒賊將李肖宇所部萬三千人才還騎十七庖
人一家丁二云經戰十三年未有如此之敗者癸未午刻

李自成回京入德勝門從馬約七千匹列東華門二十騎
自御道入前一賊抱嬰兒不知何人也是日故學士楊觀
光何瑞徵光祿少卿李天經李延鼎同鴻臚寺官八人勸
進自成曰事且亟何登極之有劉宗敏厲聲曰已有旨明
日登極各官可出料理各官退宗敏與自成爭曰爾十幾
年辛苦一旦敗壞若不登極何以回關中自成默然甲申
果僭號先燬太廟主從此壞民居運入大內為爨具丁亥
卯刻賊出阜城門留卒七百餘人入大內及各巷縱火高
弘商拘李友家被夾勒四百金詹事張維機主事蕭鴻基
至夾其骨張尚書鳳翔前出獄被拘勒四百金不夾

李自成入燕後拘明朝大小各官分營追賍有中書十數人同拘繫一室忽傳偽旨是夜俱令自經鑄鎖甚密外嚴共收之各員以次雉經氣絕縋斷大半墮地伏尸相枕籍蘇州申濟芳獨遂巡不就縊天黎明關守者啓鑰入申急迫伏積屍中詐為死狀一守卒云生死未可知當頭人與一根連梃數人忽一卒云料此輩已無生理鞭死何為遽舍之出午後命各家僮識認尸首負歸殯殮申竟得脫後年八十餘卒于家太倉唐實君為余說

甲申四月京報絕月餘留都疑阻十三日有中人夜至內府云京師三月十九日已失守明晨張總憲藐山慎借御

史周元泰朱國昌郭維經米壽圖至高司農弘圖確齋所少頃確齋及史尚書可法呂侍郎大器姜詹事曰廣集議監國首福王或云潞王時並僑淮安高張之意屬于洛陽史頗不然之意在衛輝恐北耗未確尚爾遂巡俄奏差回自都下云三月十六日丐服手菜筐逃出京其夕炮聲遠震迨旦寂然餘不知也諸人唯唯各散二十二日史尚書以三千騎勤王渡江俾呂侍郎攝禮部印越三日史尚書速諸臣往江浦議事侍郎得史手札即傳示諸公素服會清議堂謀葺武英殿二十七日有中人奔南備悉凶問是日告奉先殿姜詹事撰文高尚書舉筆云神宗皇帝之第

二子第一藩云云而史尚書札至意專衛輝尋又札云洛陽衛輝並南下當拈圖孝陵之前云云此何總督鳳陽馬士英書來奉福王發淮安將及矣即日守備南京太監韓贊周出迎二十九日王舟泊燕子磯明日抵龍江關先召見列侯次尚書史可法高弘圖程註都御史張慎言同謁舟中王左手挈史右手挈高跣跣答之角巾衣葛坐榻上衾枕俱敝蚊虻不具五月朔登三山門環城而東謁孝陵自朝門入經東西華門宿外守備廳四日監國傳諭天下是役也南都始議未定馬士英成之史尚書前督鳳陽稔知福世子湛于酒色徐魏公弘基值高尚書于皇城下曰

事亟矣惟賢是立何論序乎史在高郵聞福王舟近即列諸臣名啓迎或云士英初意亦不專洛陽與史尚書間偶值福王舟擁而南背其始議後謂臣以兵十萬護蹕臨江欲駕南都諸公之罪給事中李沾謂告廟文出臣筆皆非其實也

南渡年號閣擬定武弘光拜天探籌得弘光冢宰張藐山曰光字一於文為火 清朝年號曰治從水水能尅火奈何果如其言

馬士英挾迎駕之功自江北來朝不欲出鎮故事輔臣必有入閣辦事之旨士英特繫銜大學士非內任也竟據政

府史相國因自請出鎮鑄督師輔臣之印士英忌史聲望
遠出己上又史先東士英有福藩不忠不孝等語士英意
脅之史求還故牘終不相忘掣肘陰螫以勞勩難泯遂移
構新建姜相國謂觀望異議莫并陷史也

燕京從逆諸臣留都傳報不一其最著者鄉人乘怨輒馳
檄聲討姑蘇則首項煜錢位坤宋學顯湯有慶常熟則首
時敏皆焚毀屋廬尋臺臣嚴禁御史祁彪佳撫安蘇松常
鎮誅首亂六人乃止

桐城阮大鍼初附東林與嘉善魏忠節爭吏掌科因投逆
璫歷太常少卿坐黨廢避福金陵稱詩好客素善內臣馬

應芳馬士英僑南都時數數過從南渡初總憲張藐山改
冢宰奉詔言逆案置勿用大鍼計沮喉誠意伯劉孔昭杜
勳臣廷攻冢宰專右文臣自是冢宰四疏乞休士英密薦
大鍼言其知兵立除兵部右侍郎召對以高相國廷爭臺
省交論未拜命而心益急士英令徐侯之及涖官每朝罷
輒手招士英就語自示於諸紳中日同士英輩狎飲後常
熟錢侍郎附焉錢寵姬柳如是大鍼請見遺以玉帶曰為
若覓恩封談孺木云

張冢宰藐山去後誠意伯劉孔昭之權日甚自謀入相不
得乃薦兵部侍郎德清蔡奕琛南都之禍始于誠意潰于

士英大鉞

司禮韓贊周字象雲賢內侍也福王始而憚中而踈末且厭之嘗盛暑擊毬三人交策不休贊周凝立不動十二月西宮成臨御上色不怡贊周請其故上曰無佳優人奈何贊周泣曰臣意官家思先帝乃如此抱恨乎上長責太監馬承芳爾但知印堂安知我印堂指贊周也

黃澍本歙人年少輕侮作葉子格品第宗婦之貌見擯于族走杭州冒籍郡庠丙子舉于鄉明年成進士授開封推官壬午禦流賊開渠轉粟河水秋溢遂灌汴城福自開渠始又搜民間藏粟併金錢奪之汴人切齒及內召烈皇帝

面問開渠者誰也委之流賊利口迅舌人莫能難以御史按楚未及瓜遽入朝意覬開府廷劾馬士英責數其罪福王色動云黃澍言之有理顧高相國記之士英跪階下惶媿欲死出因行金結內臣張執中等蓋平賊將軍左良玉賺馬氏故大言清君側之惡澍出良玉手書挾重鎮以劫之及澍還按楚士英陰遣人購良玉而澍孤矣尋免其官畏禍匿良玉所女歸其子明年左氏稱兵犯闕實澍為之厲階也

乙酉五月南都敗士英出逃至孝陵詭飾其母為太后名守陵黔兵自衛所過劫掠一空從廣德州走安吉知縣黃

翼聖掃衙舍以停偽太后及士英家眷浙撫張秉貞下檄
安吉問太后真偽翼聖啟曰閣部既真恐太后亦非假張
遂備法駕迎入杭州偽太后駐朝天門東李總兵宅士英
屯兵湧金門外王氏園潞王恭謁太后如常禮辭之已令
妃具宴送入妃躬詣陪侍復峻辭之日夕惟與士英後妻
及婢數人相處人始疑其偽本朝兵將至士英走台州
魯王監國訪太后不得會稽熊少卿汝霖責士英不扈皇
上乃母后之狗乎士英無以應戢山劉先生前削籍家居
南渡起左都御史入京不攜冠服先馳疏自稱草莽臣歷
指時事之失內及逃將封爵貴陽及劉澤清忌之蓋劉自

臨清南道謂中其隱各疏攻先生澤清疏并列左良玉黃
得功劉良佐高傑名請加以重僂實各鎮不知也先生至
南京借冠服赴任士民鼓舞稱快羣瑞亦曰劉先生君子
也恐不得久耳果即引去

旨稱閣臣例先生九列例稱卿徐冢宰石麟忤貴陽有旨
叱其名徐尋引去

甲申秋南教坊不足充下陳私徵之遠境阮大鍼楊文驄
馮可宗輩各購進大內嘗演麒麟傳奇劇未終妓人首戴
金鳳者三蓋宮中例承幸者戴金花以自別也

甲申九月南都有選宮之命皇太后自于外守備廳擇六

人未噉命再選初各官恣慎其後會于貢院狎笑褻視選
七十餘人寢及蘇杭太后侍女金花年十八來自中州殊
色也所選並不逮王待如妃禮明年阮大鍼入其宗女雖
妹麗究不知誰氏也又書佐周某自獻其女太監田成來
駐杭州貢院樹黃旗二選五人止王氏留京上之出奔也
阮氏周氏王氏命還家

福王時雜謠。弘光年要做官非騎馬英士即種田太監射
人先射馬英士擒賊先擒王鐸紅花開天子來不辦衣衫只
辨鞋。又聯周延儒字玉繩先賜玉後賜繩繩繫延儒之
頸一同狐狗之頭馬士英號瑤草家藏瑤腹藏草草貫士

英之皮遂作牛羊之鞞。自成不成福王無福兩下皆非

真主北人用牛金星南人用馬一般俱是畜生

倪鴻寶先生與同邑丁庶子進俱天啟壬戌進士選庶常

嘗中秋聯句丁首唱云中秋佳節好吟詩為人所哂上偶

問崩字何義丁曰君死曰崩倪曰先帝升遐曰崩進自慚

漸與倪成隙倪少娶餘姚陳氏失歡後官尚書以妾王氏

膺誥封丁遂脩怨嗾誠意伯劉孔昭訐其事倪奏辨陳氏

失母意遣歸外家命娶王宜封引海瑞前妻許氏潘氏弗

封封繼妻王氏為例幸上不問倪竟以此自免歸陳氏實

同母夫人居非遣歸者甲申末陳氏訴于朝時孔昭任事

奪王氏改封陳氏

史相國分立四鎮意在收江北之援卒不得其擬先是四鎮兵各三萬餉六十萬高傑最強悍黃得功劉良佐次之劉澤清為極弱史于揚州大會諸將下拜求出師傑雖跋扈頗感動遂率眾而北傑至睢州為許定國刺死中旨切責定國定國畏罪遂導本朝兵南下

乙酉三月初九夜嘉興府城內外居民戶上各有圈或紅或白或書上或書日或斜書雙曉起驚異不知所自至閏六月罹兵燹惟白圈白書之家不火徐敬可云

楊文馳字龍友貴州解元不第宰青田後量移江寧癸未

蕪湖兵擾西征自敘事平仍返縣任張藐山改都御史疏劾文馳榜其門不令視事明年夏馬士英入相文馳以甥婿起鎮江推官未行擢職方主事尋監軍鎮江明年五月拜巡撫僉都御史一日遽南遁時總兵鄭彩方陳列江上聞之兵立潰福王聞報即出奔迨曉馬士英亦逃南國亡福王稱制語輔臣以先後妻妃三時方訪母后於中州未及宮眷御史陳潛夫按河南以童氏至有司護送入京年殆三旬坐詐冒下錦衣衛獄童氏係獄中上書云某年月日娶我某年月日陛下出亡所衣某色所飯何品所出何地又首帕妾所加也云云此書不知緹帥馮可宗作何狀

獄上後傳諭有與潛夫同卧起之語絲綸之地豈應污褻
若此耶聞劉澤清婦劉氏上馬士英夫人書救童氏
乙酉六月 本朝兵至杭州潞王常泐巡撫張秉貞以城
降兩浙風靡總兵王之仁守定海上其印都督方國安自
杭走金華與朱尚書大典合兵尚書以方兵剽詐不許遂
相持會山陰太學鄭遵謙倡義兵熊少卿汝霖孫職方嘉
績應之寧波則刑部員外郎錢肅樂浙東響集迎魯王于
台州西興築土城守江國安東下富陽分屯金村嶺朱橋
其屯朱橋則國安兄子元振也號土漢營大總兵萬餘船
五百餘沿朱橋列柵至轉塘口或說之曰山路莫要于西

溪而橫山大嶺扼其衝旁多間道黃竹可伏兵從此距營
二里為清風亭以千人據之且西接五雲天竺可俯瞰杭
城益張翅兵連合江東縱復不利豈能越險薄我營哉元
科不以為然元科亦國安兄子戍旗營三總也八月元科
以三十騎直趨六和塔明日戰于清風亭江東兵莫敢登
岍越三日 本朝大兵自六和塔來攻國安浮江身自督
戰自晨至晡國安失利 本朝大兵覘橫山清風亭俱無
伏九月幾望以八百騎自清風亭五百騎自橫山夜去營
一里乘勢奪橋橋偏寨門守兵皆走元科手斬數人嬰柵
力戰 本朝大兵登廟山望柵中白牆不相屬遽發炮牆

傾大呼馳入方兵大潰僅得及舟而遁遂焚其柵自是國
安不復能渡江丙戌五月征南大將軍貝勒李羅至西興
荆國公方國安將走台州馬士英以許封西平王勸國安
降遂解甲後與元振俱被殺

馬士英奔紹興辨臣非悞國又挾方國安為重命戴罪圖
功丙戌六月朔首逃

金正希先生倡義于休寧同縣令何通武遣諸生朱備迎
黃澍于九江寔不知澍已通款本朝也九月本朝帥
張天祿畧地且至戰失利先生與歙縣諸生江天一同被
執見洪承疇不屈遇害僧某殯之題曰赤壁金公柩扶至

蕪湖閩商某薄其棺改殯焉

徐冢宰虞求原名文治本禾郡諸生萬厯庚子斥場屋赴

南武闈舉第一被攻走江楚殆二十年青浦令其受業生

也遂補青浦諸生舉於鄉天啓壬戌成進士歷官介潔屢

起屢忤乙酉閏六月二十六日本朝兵下嘉興先一夕

公入城聞敗自經于故第精嚴寺僧真實殯以米困袖有

詩扇蒼頭祖敏殉其旁先生有別墅在賀家橋南其孫顯

武與予善時過話前事所著名可經堂集

錢唐大遮山東明寺相傳建文帝曾避跡於此本朝順

治丙戌某月某日有二十二人皆偉幹傑貌免胄而入命

守僧以米三斗作飯豆一斗作乳倉卒具食僧異之問飽未曰未也亦不敢飽飯後徧視佛像不拜見建文像則拜而下過一人在前餘隨後不敢並已而求浴裹衣朱殷膚如刻漆人臂二弓腰三鏡試鳥雀不一失鎧仗重鐵度所負荷皆百餘斤其一人泣拜者挽鞭重數十斤合二僧之力僅能舉而彼運之如棕拂竹如意問邑里姓氏不答聞其聲知為北人也問今何所往則泪隱隱承睫曰吾糗盡遊觀天下無可起事者吾安之乎曰三吳足賦可就也曰取三吳未能集事僧曰以諸公之敢力赴義何患無成默不應諷之苦空亦不應僧曰即出值官兵奈何曰吾仗劍

行數千里先後所值何嘗百十彼烏能難我僧曰自此至天目民寨殆百餘所稱義師能往觀乎曰曾按視一二所皆盜耳不足目也因問道僧述天目徑山湖州之程曰吾之湖州曰湖州多守兵曰固欲遇守兵遂胄而出每一人胄兩人力收之目欲迸火尋問其遇守兵殺五百餘人而二十二人無恙愾然歎曰吾多殺亦何益且吾所以來豈為此輩哉皆授碧浪湖死外舅陸丰齋先生述寺僧指月之語也洪武三年庚戌五月始詔行科舉直隸貢百人河南山東山西陝西北平浙江福建江西湖廣各五十人廣東廣西各二十五人時直隸就試者百三十二人拔七十二人見

考官宋濂溪鄉闈紀錄序試錄曰小錄按登科考無錫俞
憲所輯中載在京鄉試直隸府州一百名河南山東山西
陝西北平浙江福建江西湖廣東各四十名廣西二十五
名與濂溪集微有不同又按登科考洪武三年庚戌鄉試
四年辛亥會試以後至十七年甲子始復行鄉試而金華
府志有庚戌辛亥壬子癸丑連歲開科之語紹興府志云
六年金鑄榜不知其何所出

雲南開科始永樂九年辛卯時貴州尚未附宣德四年雲
南貴州始合試共取十一人後漸增至嘉靖十四年分定
雲南舉四十人貴州舉二十五人

府歲貢二人縣歲貢一人洪武二十五年定嘉靖十年令
天下歲貢五人選其一歲貢通學考選至十五年止天啟
元年鄉試乙榜廩生准貢崇禎元年戊辰以登極始有恩
貢乙亥通考各學廩生拔貢一人己卯鄉試乙榜供充貢
不論增附

永樂二年己選庶吉士矣而戶部辦事進士當塗李衡以
年少自請命改庶吉士同江寧楊寧習書至宣德八年三
月己選庶吉士十一月又選前科進士能文者徐理等十
三人為庶吉士命學士王直教習此教習之始也
舊制貢士三科不第禁赴會試弘治三年始弛此禁

弘治壬戌科選庶吉士并修撰康海編脩孫清李廷相俱
課書學士梁儲王革教習先是天順四年選庶吉士劉健
等十五人并脩撰王一夔編脩李永通鄭環命學士劉定
之侍讀錢溥教習此外鼎甲不在館課之列萬曆甲辰
後選館概課而鼎甲不出序今弊庶常一例論先後矣
正德甲子四川解元周洪謨丁卯福建解元陳俊第一場
俱五義

嘉靖初會場禮部條約許舉子帶洪武正韻一部表末不
用瞻天仰聖見董穀碧里雜存
科場舊規正主考閱易書二經副主考閱詩禮春秋三經

各不相涉見詞林典故

李九我舉鄉試第一申少師瑤泉即留為館賓轉館于歸
安董宗伯家癸未李得會元申正當國廷試時文定以子
用懋入試避讀卷是科秀水朱文恪公一甲第一李名在
第二賜第後九我見秀水頗怏怏一日秀水疾李過候坐
榻倚推窓見庭松蟠屈笑曰弟嘗夢歷此景或云功名在
是今得之矣名次兄後非豫兆耶自後歡洽無間
殿試策進呈必取書法整齊無舛謫者隆慶戊辰科閣臣
擬進上疑首卷有私於二甲卷首得羅萬化真第一其卷
字多塗抹者

各省鄉試專遣京官始于萬厯乙酉舊主副俱教職由監察御史所聘布政使提調按察使監臨彌封謄錄所卷皆有司例得閱墨卷有所識拔內簾無敢違者自專差朝臣內外簾始隔絕

典試差部主事始于萬厯甲午禮部推湖廣主試翰林院某吏科左給事葉繼美上點葉另用工部主事莊懋華韓求仲先生師事湯宣城萬厯庚戌湯分考搜鄰房拔韓卷會元時方忌湯遂并攻韓竟免官終身不達鄉榜監試例巡按御史或偶缺則代以巡鹽萬厯乙卯貴州巡撫張霍鳴代監試此巡撫監場之始也

萬厯丙辰會元吳江沈同和文倩第六名趙鳴陽作事發二人俱褫革京師以戲子戲謂斷么絕六

天啟壬戌會試閣臣何宗彥顧秉謙主禮闈上點宗彥忽及朱養純顧疑秀水有他故頗不憚後秀水捐館顧擬謚文懿朱公子力爭得謚文恪

廷試策偶悞筆以塗注不便例多任之萬厯己未科狀元莊際昌^{崇禎}悞膠辛未狀元陳于泰陽悞易榜眼吳偉業^{崇禎}悞曠

殿試進呈惟會元策另封此明朝舊例也今不然明朝宗室進士天啟崇禎兩朝共十一人釋褐後例補輔

國中尉惟戊辰科新建朱統鈔選庶吉士改中書舍人復入館歷國子祭酒

萬厯丙辰進士同姓名者張銓一大名人一沁水人俱乙亥正月二十六日生科第子女先同

莆田科甲最盛宋時進士九百七十餘人諸科特奏名六百四十餘人大魁五人宰輔六人明朝自洪武庚戌至嘉靖戊子凡五十二科中鄉舉一千一百一十人進士三百二十四人狀元二人探花四人會元一人解元二十五人鄉報急足始嘉靖中其時舉子尚自備青袍後官給不知所自

選歷科程墨自萬厯庚辰錢唐人錢穀字豐寰始錢貢生官終曲靖知府

會試同門房刻始萬厯壬辰

明朝故事御批一甲三人卷用玉管筆拆卷在中極殿左兩京鄉試及會試試錄序皆稱臣外省則否以考官所自序也萬厯初上摘此以問閣臣欲罪之江陵具言其故乃止其後各省錄序皆稱臣

兗州滋陽縣儒學祀宗聖顏子之神與天下不同

見西卷志

土木之難李襄敏秉從征脫歸進戶部主事夜夢作詩送楊鴻臚善迎駕其詩云天恩寵渥作鹽梅迎復君王出紫

臺羣鹵潛踪歸沙漠六龍回駕入蓬萊明日以語同官明年事驗

御史出巡舊騎馬後乘輿不知起于何時當是成化以後事浙江有舉子王化大帽見按臺某按呵之間所從起對曰即起于大人乘轎之年

吳縣朱良育績學不第膺歲貢子鴻漸成進士官主事馳封不受竟以明經沒

鄞縣余相國文敏有父永麟幼喪父育于小江里余氏後鄉舉歷蘇州通判生文敏既貴當贈三代不知所自出不
得已贈永麟所後父憐及憐父鏗而命子孫家祭則自蘇

州公始。文敏少從其父宦蘇州慕崑山歸有光名將師之不果嘉靖乙丑文敏以編脩分闈拔有光第二

戚少保光繼鎮薊門駐三屯營最久經畫周詳沒後有祠總

兵尤繼先到任不拜祠除夕公庫災獨題梁及銀牌存題梁年月少保所記繼先歎曰戚公神人也刑牲以祭

上海唐柳所獻先生謚文恪易名之典仍犯其名何也宜如陳莊靖文之例易之

嘉善錢龍門初入翰林崇仁吳相國文定南道語之曰若初到衙門須記三事不擬試題不受門生不出遊庶保名節

嘉善丁清惠公與烏程朱平涵國禎相國善謂其居台鼎

猶秀才氣象

明初朝鮮國王獻顏子以偽書却之按古今偽書不一而足如毛漸偽三墳張昇偽元命苞孫定偽關尹子阮逸偽元經宋咸偽孔叢子戴師愈偽麻衣子袁康偽吳越春秋明崑山王逢年偽天祿閣外史海鹽姚士彝偽於陵子皆不滿識者一噓也

萬曆六年河南李蔭宰宛平構小齋發礎得唐李邕雲麾將軍碑云碑石蕪沒良鄉驛舍裂為柱礎蔭葦置邑署名其齋為古墨可辨者百八十九字首篆存唐故雲三字宋學士潛溪前後集元季已盛行于世入明朝劉伯溫選

定為文粹十卷門人方孝孺鄭濟等又選續文粹十卷皆孝孺與同門劉綱林靜樓連手自繕寫刊于義門書塾常熟錢宗伯牧齋曾于內閣見之孝孺姓名皆用墨塗已蓋遵革除舊禁也

鄭所南心史崇禎戊寅十一月八日蘇州承天寺浚智井得鐵函重續外標大宋鐵函經內書大宋孤臣鄭思肖百拜封自元世祖癸未歷三百五十六年其書始見于世其精氣自不可磨沒也朱竹垞云此是偽托不知何據李空同刻淵明集盡去評註曰青黃者本災也太羹之味豈羣口所嚙哉

江都葛澗子常好積書撰國朝人物編自洪武迄嘉靖數百卷人為列傳甚悉年七十餘卒友人私謚為正學先生今其書不可得也

王元美所著讀書後四本捐館後公子吏部士騏于貨郎擔中重得刻以行世又有毀論十本係先生手書無副本牧齋宗伯乞于吏部秘不示人辛卯九月燔于絳雲樓一炬惜哉

新建張洪陽位司業刊二十一史於北雍糜工部六萬金有奇見李湘洲集

濮州李尚寶先芳選明朝燕趙秦晉齊魯河洛淮揚藩邸

之詩附以蜀日明雋吳越荆楚不與焉東阿于文定序曰自二南以下十五國風皆江以北地也降而春秋吳越之歌吟乃出降而戰國荆楚之騷賦始傳故江以南之聲則歌吟騷賦之流而風之餘也非始音也原音之始以北先也。按李尚寶與王元美同時人

南兗陳文憲于陞當國時脩正史列聖本紀皇后本紀建文景泰以實錄附載而不作紀郊祀廟祀典禮樂律天文厯法宗藩學校選舉職官經籍賦役貨幣漕運河渠鹽法軍政兵制馬政刑法郡國九邊二十三志楊徐滁陽三王高祖之十七藩成祖之二藩仁宗英宗各四藩憲宗之三

藩外戚洪武之功臣諸臣建文諸臣永樂之功臣諸臣洪
宣諸臣正統天順景泰諸臣成化諸臣弘治諸臣正德諸
臣嘉靖諸臣隆慶諸臣又理學文苑循吏高逸孝節亂逆
權幸方技四夷列傳二十六紀志粗畢擬草列傳丁酉六
月三殿災輟業南克卒四明沈相國殊不以為意非其始
議也書竟不成

西泠社事起萬曆丙戌八月時歙縣汪伯玉鄞縣屠長卿
輩集西湖之淨慈寺地主則仁和卓明卿餘杭徐柱
杭州布衣陳植之業醫苦吟好學其五言佳句如疎鐘四
壁靜微雨一燈明移花春徑雨看竹午窓風絕似中唐風

格惜全章散佚不傳周青士所紀尚多偶錄此

洪武開國事略本湖廣行都司經歷蔡于壁之龍飛紀略
卓氏藻林本吳興王氏所輯嘉隆以來諸公掠美者頗多
藏書之厄如浦江鄭氏八萬卷燬于火義烏虞守愚侍郎
德燭叅政父子築樓藏書萬卷署曰樓不延客書不借人
後蘭溪胡孝廉應麟賤直得之隨亦散佚太倉王弁州書
最富再傳而失開封中尉睦樛之萬卷堂會稽鈕氏之萬
卷樓吾鄉祝侍郎耳劉之萬古樓武原駱侍御駸曹平湖
馮孝廉茂遠常熟錢宗伯牧齋非流散則灰燼矣楊循吉
既老散書與親故云令蕩子爨婦無復着手亦一道也

錢牧齋撰明史共二百五十卷順治辛卯九月晦甫畢越後日絳雲樓火見朱衣人無數出入烟燄中隻字不存黃石齋先生著孝經集傳又奉命纂洪範明義四卷戊寅謫官即進呈云臣考篇中有錯簡者三訛字者三錯簡如五紀三德敷言錯而在後成福建極敷言錯而在前訛字如晨為農戈為忒殛為極之類皆伏鬼之所不稽鄭孔之所未說宋元諸儒稍發其端明興諸儒未竟厥緒云云崇禎癸未楚撫宋一崔敗沒妾金陵陳氏色藝兩絕為門客王屋所聘貴陽謝叅政上選先娶致訟新安程奎戲作絕句歌舞叢中度歲華一朝忽散抱琵琶前身定是烏衣

燕不在王家即謝家

長泰盧岐嶷嘉靖甲辰進士終貴州按察使初為戶部郎與汪道昆同舍時有餽汪脂香油皂者汪徵故實盧曰唐人謝賜口脂豆澡此二物也宴席有獅糖汪復問于古云何盧曰漢光武禁視糖不許高大此是已

李空同作文凡地名官銜俱因時制不用古名

江陰李戒菴湯筆載先世分關中寫吳原年洪武原年俱不用元字想國初惡勝國之號故民間相習如此按元字避御諱元章戒菴悞矣

陳友諒後裔為沔陽柯氏馬氏與部曲談王吳三家逋居

興國大冶瑞昌界中張士誠後裔為章邱李氏初敗時乳
母攜幼子而逃冒李姓

鐵券分三等國公式二其一高一尺博尺有六寸次高九
寸五分博尺有六寸侯式三其一高九寸博尺有五寸次
高八寸博同上又次高八寸博尺有四寸五分伯式二其
一高七寸五分博尺有三寸五分次高六寸五分博尺有
二寸五分

明制文臣官銜支俸勳戚官銜不支俸

外國詔勅事竣使臣上其筒禮部轉繳內府不得損壞
御史聽選聽察首浙江道內計掌察則河南道蓋明初首

下浙江先設官洪武元年詔開封為北京示重也名勝志
云北宋以河南為京畿道故寰宇記首列河南南宋以臨
安為京畿道故紀勝要覽首列浙江明朝蓋兩沿宋制此
說非也

凡占籍者自軍匠民竈商外有儒籍官籍御醫籍先賢籍
正德庚辰吾宗常熟派穹隆公應兆以御醫籍登第崇禎
丁丑進士四川某齒錄書儒籍以祖父三世皆教職也
洪武十四年二月建太學自孔子以下皆撤像設神位外
學仍如舊至嘉靖九年天下學宮始撤像易主
征南將軍印沐氏鎮雲南世佩之其印不全用量事大小

或用一角用半角蠻人奉如尺一
南京洪武朝陽太平三門禁出柩魏國公家英鍾山許太
平門倒出

從來棺柩止有出城者故旅櫬還鄉率停于墓田康熙乙
丑崇明相國宋文恪薨于京師奉旨馳騎差官送歸公
子扶柩入蘇州府城里第治喪此變例也

宋景濂先生以洪武十四年辛酉卒于貶所英夔州蓮花
峯下越三十三年永樂癸巳十二月二十七日蜀獻王遜
英于成都之華陽安養鄉又七十二年成化乙巳十二月
十三日蜀惠王改葬錦城迎暉門外

明初文臣多不得封贈贈父母及妻始于永樂十年然其
時亦僅八人西楊勒石以垂後

京省設提學憲臣始正統元年五月命于二月八月兼督
民間栽種桑棗先是守令提調諸生孟月試經義仲月論
表季月策皆在學舍今之觀風季試其遺制也

明朝大宗伯不從翰林出身者凡三人錢唐楊寧正統遂
寧席書嘉靖嘉定徐學謨萬曆雖起署曹然皆進士出身

向例禮部堂屬未有用孝廉者康熙壬辰吾邑陳實齋訖
自司空調宗伯一時以為盛事陳壬子乙榜也
景皇帝園不稱陵在金山上距西山不十里陵前坎陷樹

多白楊及椿合三四人抱高可二十丈
建文帝葬處距景帝園不遠石碑題曰天下大法師之墓
按楊士聰玉堂薈記云駙馬都尉鞏永固請追謚稱皇帝
上語輔臣曰建文無墓何憑追復尊號惜當時無據此以
對者





